

Comentar de pruma

Identité ladina

de Marco Pizzinini

Le resultat dla cumpedada dla jont che à desmostrè n aumënt dla mendranza ladina ruvada al 4,53% é n fat dër positif suradöt inçe ciödi che les previjiuns n'è daldöt nia bunes. Chësc é n sègn tler che nosta jënt se indentifichëia cun so lingaz, sôa storia y sôa cultura. Al é inçe sigü che les normes de sconanza dl Statut de autonomia, che é gnüdes tutes dla Regiun Trentino-Südtirol, à portè sü früc. Tröpes é stades le parores de lalt da pert ofiziala do chësc bel resultat, inçe sce val' cossa podess ciämò gnì miorada. Por ejèmpl n'è le s'avëi detlarè ladin por chi che chir n laür tla aministrazion publica fora dles valades ladines nia dagnora na garanzia por l'azes a n post. Dal ater vers messunse inçe constatè, che na pert relevanta de nosta mendranza, che vir tla Provinzia de Belun, ne po nia ciämò se deltarè ladina y n'à porchël ofizialmënter gnanca degun dërt da gnì sconada. Te chësc tēmp dla globalisaziun é le suravire de na picia mendranza desco la nosta lié a tröpes coses fondamentales, danter chëstes él

Identité ladina

va inant da la pruma plata

zēnz'ater al pröm post la reunificaziun dles valades ladines al intern dla Regiun Trentin-Südtirol, adöm a n cërtil lital ladin, che garantiss na rapresentanza sigüda tl govern y inçe tl consëi provincial/regional y a na politica linguistica y culturala unitara.

Al é n proverb che dij: le tru é le travert. Y sce le travert é le suravire de nosta mendranza, spo ti fajunse n apel a nüsc rapresentanc politics, che ai laores inant, sön chësc tru por le bëgn de dōta nosta mendranza, inçe por chë pert che vir fora dles valades ladines y che inçe Fodomi y Ampezagn pois tosc se detlarè "ladins".